

# 江蘇水利全書圖說



圖說

水利全書繪圖例略

志地之書繪圖皆北上而江南通志於江淮河三水

圖則北上蓋就水之形勢也乾隆五十一年

廷寄湖廣總督武陵白沙隄工圖樣南北倒置不便閱看

嗣後勿再舛錯故近今續修行水金鑑中各圖皆南向

觀之海運全案所繪吳淞江圖亦同今此書繪列之

圖悉用是例

圖用開方法如阜昌禹蹟圖每方百里是也今按以

吳中疆域祇能一方一里然每里各縱橫三百六十

步計各二百一十六丈以河寬二十丈者僅居里十


分之一而弱也况書版高不過六寸每行至多析為二十格是每格見方寬廣僅三分以二十丈之河居三分一里之格在其中祇宜一縷若以次遞減之支河亦何從著筆今繪諸圖不復界畫方格

首列江蘇水道圖一詳地界方位也次太湖全圖一蘇省水利之大綱也次吳淞江圖二劉河圖一劉河卽婁江次泖湖圖一泖湖今為黃浦之源足當東江三者皆太湖入海之道也次白茆河圖一附徐六涇圖一七浦圖一皆分洩太湖之水者也次孟瀆德勝溇港三河圖各一常郡資以灌田濟運者也次練湖

圖說二

圖一附張官渡牘圖一亦以濟運者也次徒陽二縣境運河全圖一江浙轉漕之道歲所濬治者也次附蘇州府城河圖一江寧府城河圖一皆重濬之以便民者也







江蘇布政司所屬蘇州松江常州鎮江四府太倉一州領縣凡三十有二其為田地山蕩灘塗峯濶等則共二十四萬七千一百一十五頃有奇應納銀二百一十五萬兩本色米豆一百九十九萬一千八百石壤地不博財賦素繁此農田水利之不可不亟亟也數年來各郡之輸河若吳淞江劉家港三泖七浦白茆孟瀆者多為重濬矣而漕運之道出於京口者亦講求深通設厝以資輸送今並各縣之水次以達運者總繪為圖

國計民生職宜慎重者焉

# 太湖全圖










太湖二


太湖廣三萬六千頃在蘇州府者十之五為吳縣長洲吳江震澤四縣界在常州府者十之三為無錫陽湖宜興荆溪四縣界其在浙江湖州府者十之二為烏程長興二縣界其來源則自廣通設壩宣歙金陵之水不入矣今惟天目四安諸水會於霅苕以入者為大而金壇溧陽各山水注為百瀆者亦自西北來以歸於湖也其東出也則自吳家港瓜涇港鮎魚口牛毛墩浪打川等處分布於三江漫衍迤邐以入海雖其中菱蕩菱塘或設為魚簍停泥斷港久之多佔成田然東南之澤要為最巨誠水利之大綱哉

# 吳淞江全圖



吳淞一






吳淞四

吳淞江自吳江長橋起至海口凡二百六十里太湖之東流正榦也歷吳江震澤吳縣元和崑山新陽嘉定青浦上海九縣地舊合澱山湖大泖長泖圓泖諸湖蕩趙屯大盈顧會崧子盤龍五大浦之水以入於海故其源甚清其流亦壯自夏駕浦新洋江分洩於婁江而淞之中流弱自范家浜開闢會於黃浦而淞之尾閘奪矣渾潮湧入易致形勢變遷故攷江之兩厓浦港涇浜脈絡貫通其迹尚有可循者備繪之以待濬治庶還黃渡練祁東西數十里間水田之舊亦農政之所宜究心也

# 重濬吳淞江工段圖



工段一



江蘇巡撫臣陶澍跪

奏竊臣查江浙水利莫大於太湖其分洩入海之路有三一曰吳淞江即太湖正流也一曰黃浦即東江也一曰劉河即婁江也吳淞最大自分流南入黃浦而吳淞日微劉河亦逐漸增淤矣每遇霖潦水無所歸澇而成災議者但咎水利不修由於上流不疾下流遂淤之所致欲舉全省之湖塘浦汙而挑之濬之撈之無論工費浩大亦無如許人力就使挑空全通建瓴直下而水無滯蓄一瀉無餘豈民田之利哉夫太

湖號稱三百餘里其實祇係藪澤寬而不深所收江浙及宣歙諸水發源不遠不過三五百里而止東及海濱亦止二三百里源短而流亦短非如洞庭彭蠡有千數百里之來源也而所灌蘇松常太杭嘉湖數府州之田畝以億萬計漕糧居天下之大半皆恃太湖為之潤漑此不徒憂澇而並宜防旱也其間縱浦橫塘十灣九曲皆天然之溝洫所以資蓄洩而猶不免於偏災偶見者其來有漸殆非一朝夕之故究其弊端多由民田侵佔爭及尺寸而江流日隘兼自明代以來言水利者往往不顧全局遇有壅滯不治其

本而別開津汊以苟一時之利以致支流愈分正流日塞然此二者之為害猶顯而易見惟吳淞江口建閘一事則不但不究其害而羣且議以為利謂潮來下板可以遏沙潮退啟板清水仍可暢出其說似是而非夫吳淞為禹貢三江之一與岷江浙江並列乃天地所以吞吐陰陽之氣非如無源之港汊可以扼其吭而為之節也海潮既能挾沙而來即能挾沙而去如岷江浙江其委未嘗置閘而沙固未嘗淤也况江身亦自有淤泥尚欲藉潮退之勢推卸以入海一經置閘內外隔絕潮水之挾沙而上者無江水為之

回送而沙停於閘外矣江水之挾泥而下者無潮水為之掣卸而泥停於閘內矣臣此次遵旨覆勘工程由青浦華亭至上海親見黃浦無閘而海潮鼓盪江面闊深吳淞江有老閘又有金家灣新閘而沙泥停積數十里水小如溝船隻往來反俟潮水為之浮送詢問土人僉稱老閘建自康熙年間甫成即圯新閘成於乾隆二年亦止虛設難於下板緣閘距吳淞黃浦合流之處僅六七里全潮灌入非閘所能禦該處沙土鬆浮一經下板閘身震動是以徒有歲給閘夫銀兩毫無實濟轉足以阻礙船行停滯沙泥

幸上年估工未修並未糜費臣思吳淞江爲江浙水利第一樞紐其上源不宜直瀉所以蓄水勢而口門則斷不可梗塞以致停淤也石閘有害無利應行拆除其閘前閘後所積沙泥併沿江灣曲淺灘均應設法疏挑俾資通順以利全省似未可以經費未充遂爲停歇容臣與督臣再細確商飭司妥議一俟籌有成局另行確估興工至三吳農田絕少隄圩每虞潦澇惟有照業食佃力之法於隆冬閒暇時按畝出夫一二名挑淺濬深卽因出土以爲圩圍每歲通力合作以三日爲率約計出土可高一二尺越三四歲而

圩圍可成矣但須良有司久任而民信從者始能爲之此則微臣目前所未逮而有志焉者也所有勘視水道並擬續辦吳淞水利緣由謹附片具陳伏乞

聖鑒訓示謹

奏

道光五年七月二十三日具

奏道光五年八月二十九日在江寧公署奉到

硃批另有旨欽此同日奉到道光五年八月十三日奉

上諭陶澍奏吳淞江口所建石閘有害無利老閘甫成卽

圯新閘亦止虛設難於下板徒有歲給閘夫銀兩毫無

實濟應行拆除等語吳淞江爲江浙水利關鍵原建閘座本爲禦潮而設若果如該撫所勘情形不但不能禦潮轉足以阻礙船行停滯沙泥自應拆除以利水道惟當時屢次建閘自非無因且現有議以爲利者亦未可遠行拆去著該撫與琦善再行詳勘情形細心商確如果必應拆除另行飭司妥議確估辦理此閘經歷有年且現在南河興舉要工卽從緩辦亦無不可也將此諭知陶澍並諭琦善知之欽此

大學士兩江總督臣蔣攸銘江蘇巡撫臣陶澍跪  
奏爲籌備挑濬吳淞江銀款恭摺具

奏仰祈

聖鑒事竊照蘇省吳淞江自吳江震澤二縣起至上海縣  
與黃浦合流之處綿亘二百數十里爲太湖自西達  
東正流蘇松太及浙江省之杭嘉湖六府州屬水利  
攸關前於道光三年蘇松等屬雨水成災經前督臣  
孫玉庭撫臣韓文綺查係吳淞江等處淤塞所致籌  
議疏通擇要興挑約計估需土方等銀四十萬一千  
餘兩循照三江水利成案借

重濬吳淞江全案

卷一

五

帑興辦於捐監銀兩內借動給發分年攤徵還款嗣因  
高堰興辦大工集夫不易經前督臣魏元煜撫臣張  
師誠議將黃浦下注一路水道估銀七萬七千二百  
餘兩之工先爲挑濬其吳淞等處工段因捐監銀兩  
續經解部無款可籌

奏準暫停數年俟經費充足有款可借再行勘辦在案

臣陶澍於道光五年六月莅任遵

旨覆勘黃浦下注挑工時順道詣吳淞周歷勘視沿江灣  
曲淺灘節節淤滯當經附片聲明仍應設法疏挑以  
利全省未可以經費未充遂爲停歇復經飭司籌議

去後茲據蘇州藩司梁章鉅署江蘇臬司潘恭常護  
理蘇松太道陳鑾會詳稱吳淞江前因淤塞日久議  
請借項興挑仍於得沾水利州縣各花戶名下徵還  
歸款嗣奉部飭一切工程概行停止緩辦遂爾中止  
本年五月藩司梁章鉅因查勘泖湖復赴吳淞江一  
帶勘得該處淤墊愈甚必須大加濬治統計數十里  
內切灘築岸打壩挑河非照四年分所估銀三十餘  
萬兩之數不能有濟當查松江府志載前明及我  
朝康熙年間均係截留江浙兩省折漕銀兩以充挑濬吳  
淞江工費現當

重濬吳淞江全案

卷一

六

國用浩繁之際動

帑固難踵行卽前議借墊攤還而蘇松各屬自道光三  
年水災後民間元氣未復近年以來時有偏災緩徵  
錢漕新陳並納力已不逮恐借

帑墊辦亦難於攤徵歸款此外又無鉅款可籌兼查本  
年新漕欽奉

諭旨仍由海運則吳淞江爲各州縣駁運米石經由要道  
尤應趕緊興辦以免繞道黃浦致虞疏失未便因現  
當停緩工程期內拘泥貽誤伏查蘇松常鎮太四府  
一州漕糧項下應徵贈五及白糧盤耗運飯等米九

萬八千七百餘石河運年分本係給丁之款上屆米由海運無須給丁節省存倉當經

奏準糶變每石照時價酌定銀二兩二錢五分共收米價銀二十二萬二千餘兩解歸道庫報撥在案來春復辦海運贈五等米亦應歸節省可否將此項節省米石照案仍請糶變並請將糶存米價免其報撥作為挑濬吳淞江經費以海運節省之米價即為挑辦海運駁米河道之用不但各屬駁船免涉黃浦波濤之險而吳淞江六十餘里淤墊盡除為各郡農田收永賴之利上無損於

帑藏下不累及閭閻且

國計民生理應並重同一節省之款上屆報撥以裕課今次動用以免徵籌

國籌民兩有裨益雖覈照原估挑費尚有未敷仍可在外籌湊惟前項挑濬工程九十月間必當及早舉辦而本年節省之米須俟全漕完竣後截數次年三四月間始能照時價出糶應請先於本年平糶緩漕米價銀內暫借銀二十餘萬兩給發領辦以便及時興工仍俟明春將節省各款米石變價銀兩如數歸款如此一轉移間要工既得速舉而民田運道永資利

賴等情詳請具

奏前來<sup>臣</sup>等伏查吳淞江為數郡農田蓄洩所資亦係民商船隻經由要道現辦海運駁船來往尤關緊要所有挑濬工需自應早為籌計惟

國家經費有常自未便遽請動款據藩司會同臬司蘇松太道詳請將來年復辦海運案內節省贈五等米照案糶變其糶出價值請免報撥畱作挑濬吳淞江經費尙有不敷由外籌措係屬以公濟公並非動用正項錢糧可比惟此項挑濬工程九十月間即須及早舉辦請先於本年平糶緩漕米價銀內暫借銀二十餘萬兩給發領辦以便及時興工俾得利漕便民相應據實

奏明請

旨施行如蒙

俞允所有暫借緩漕平糶銀兩一俟明春將海運節省各款米石變價出糶立即歸還正款不致延宕除飭趕緊確勘估計另行

奏報外所有籌備挑濬吳淞江銀款緣由謹合詞恭摺具

奏伏乞

皇上聖鑒訓示謹

奏

道光七年七月十五日具

奏道光七年八月二十日奉到

硃批另有旨欽此同日並奉道光七年八月初四日內閣奉

上諭蔣攸銛等奏籌備挑濬吳淞江銀款及時興辦一摺江蘇省三江水利前會議準興辦嗣因高堰興辦大工集夫不易僅將黃浦一路水道先為挑濬吳淞各工暫行停辦昨據御史李鵬奏請及早設法疏濬當經降旨

重濬吳淞江全案

卷一

九

令該督等籌議勘辦茲蔣攸銛等於未經接奉諭旨之先已議籌款挑濬著照所請準其將明年辦理海運案內節省蘇松常鎮太四府一州應徵贈五等米糶變價銀留為挑濬經費先於本年平糶緩漕米價銀內借動銀二十餘萬兩及早給發領辦所借銀兩俟明年春將海運節省各款米石變價後即行還款該督等即遴派道府大員詳勘確估如法疏治務期農田水道實有裨益俟挑工完竣著陶澍親往驗收勿任草率偷減覈實報部查銷欽此

江蘇道監察御史 李鵬跪

奏為疏濬東南水利以備旱潦而利農田恭摺奏

聞仰祈

聖鑒事竊照江蘇為財賦最重之區蘇松常鎮四府加以浙西杭嘉湖三府周圍不及千里糧賦半於天下其額漕二百五十餘萬石稔米祿糶皆取給焉其田之所以產米多而歲常豐者實藉水利之有備以補天時之不齊也今則一遇水旱為災動請蠲緩賑卹兼施耗

帑以千百萬計蓋由近年支幹各河大半淤塞旱則無

重濬吳淞江全案

卷一

十

所儲蓄以資灌溉澇則無從宣洩以保禾苗而小民狃於目前之利尺寸之土在所必爭或於漲灘私植茭蘆或於河港編列漁罟皆係沙積泥淤之由以致河流不暢河湖阻塞地方官憚於興舉大工因循遷延畏難不辦害民費

帑為患日甚伏查浙西諸郡惟蘇松最居下游以杭嘉湖宣歙諸路之水潴為太湖流注於蘇松常三郡之中而入海之路則惟三江其東北由劉河入海者婁江也東南由黃浦入海者東江也吳淞一江乃太湖之正脈獨當其中所有湖蕩塘浦無不貫通三江俱

利則灌溉宣洩無所不利而水旱不足爲害矣今劉河口早已淤成平陸吳淞下游僅如溝洫祇有黃浦一江勢尙通暢惟是吳淞不通則蘇松及浙湖交界之水無從入海劉河不通則蘇州東北之水無從入海故靈潦偶降則田疇淹漫雨水少缺則車戽艱難與其補救於臨時何如綢繆於未雨所宜及時疏挑爲一勞永逸之計也查道光三年因江浙被水曾議修濬三江水利嗣僅挑濬黃浦一路將吳淞各工暫行緩辦今又閱數年淤塞益甚吳淞最關緊要未便久停當此年歲豐稔民力充裕之時鳩資集夫尙易

爲力夫

國家經費有常豈必盡資請

帑全在地方官關心民瘼將正河籌款興挑次第疏治至支渠汊港凡有關水利之處則照業食佃力之例勸諭紳耆舉董興辦各自衛其田廬誰勿樂於趨事何患工之不舉費之不集將見大江以南河渠皆通旱澇無患年穀豐而民生益厚貢賦裕而

天庾常充是所費無多而大工可成以視湖河淤阻水旱無備蠲賑並施其利害之相懸不啻倍蓰矣臣就聞見所及恭摺具

奏是否有當伏乞

皇上聖鑒謹

奏

道光七年七月二十七日奉

上諭御史李鵬奏請疏濬東南水利一摺據稱浙西各郡蘇松最居下游諸水匯入太湖由三江東流入海其東北由劉河入海者爲婁江東南由黃浦入海者爲東江吳淞一江獨當太湖下注之衝尤關緊要近則劉河口淤成平陸吳淞下游僅如溝洫雖黃浦江勢尙通暢而吳淞不通則蘇松及浙湖交界之水無從入海劉河不

通則蘇州東北之水無從入海以致水旱均災民田被害請及早設法疏濬等語江蘇省三江水利前曾議準興修嗣因需費較多僅將黃浦一路挑濬吳淞各工暫行停辦數年以來淤塞當更甚於前自應及時疏挑爲一勞永逸之計著蔣攸銛陶澍卽派委妥幹大員逐加查勘應如何將正河籌款修治其支渠汊港有關水利之處可否照業食佃力之例勸諭紳耆董辦詳細體察情形通盤籌畫定議具奏該御史摺著鈔給閱看將此諭令知之欽此

大學士兩江總督臣蔣攸銛江蘇巡撫臣陶澍跪  
奏為勘估吳淞江挑工銀數及現在督飭興辦情形仰

祈

聖鑒事竊照吳淞江關係蘇省水利前經臣陶澍於道光

五年覆勘挑工摺內聲請飭司妥議俟籌有定局另行確估興工臣蔣攸銛到任後復經會議籌挑本年

七月十五日具

奏旋於八月初五日承準軍機大臣字寄奉

上諭御史李鵬奏請疏濬東南水利一摺據稱劉河口淤成平陸吳淞下游僅如溝洫等語江蘇省三江水利前

重濬吳淞江全案

卷一

三

會議準興修嗣因需費較多僅將黃浦一路挑濬吳淞各工暫行停辦自應及時疏挑著即派委妥幹大員逐加查勘應如何將正河籌款修治其支渠汊港有關水利之處可否照業食佃力之例勸諭紳耆董辦詳細體察情形通盤籌畫定議具奏等因又於八月二十日前摺回蘇接奉

諭旨蔣攸銛等奏籌備挑濬吳淞江銀款及時興辦一摺昨據御史李鵬奏請及早疏濬當經降旨令該督等籌議勘辦茲蔣攸銛等於未經接奉諭旨之先已議籌款挑濬著照所請準其將明年辦理海運案內節省贈五

等米糶變價銀留為挑濬經費先於本年平糶緩漕米價銀內借動銀二十餘萬兩及早給發領辦即遴派道府大員詳勘確估如法疏治等因欽此均即轉行司道

勘辦去後茲據蘇州布政使梁章鉅署江蘇按察使潘恭常署蘇松太道陳鑾會詳遴委蘇州府總捕同知范博文等會同蘇州松江太倉三府州督同上海青浦嘉定三縣將吳淞水道逐細勘估查得道光四年原勘係照南河挑工土方間月則例酌估計需土方夫工築壩等項共銀三十萬五千一百餘兩迄今數年河道更形淤塞現估自井亭渡起至曹家渡止

重濬吳淞江全案

卷一

四

計四十三段工長一萬八百八十九丈八尺挑土一百一十四萬三千七百八十三方一分七釐分別深淤淺淤兩則估銀二十九萬三千零二兩八分一釐四毫又築工頭工尾柴土壩座共銀六千一百八十五兩三錢四分通共挑河築壩估銀二十九萬九千一百八十七兩四錢二分一釐四毫內有上海縣境逢灣取直之處是以現估銀數較四年原估更為減省經藩司梁章鉅親詣覆勘實係撙節確估並無浮濫惟工段綿長若僅由坐落之上海青浦嘉定三縣領辦誠恐照料難周致有草率議請分作十二分添

派得沾水利之元和吳江震澤崑山新陽太倉鎮洋  
寶山等八州縣各承挑一分上海縣境工段較長承  
挑二分青浦嘉定二縣各承挑一分並於南河稟請  
選派熟諳工程之幹練備弁河兵幫同照料於九月  
二十二日上下次第築壩至十月十一日曹家渡攔  
潮大壩合龍旋即戽水興挑所有工費除動用平糶  
米價銀款工竣覈實造報外尙有不敷仍照原  
奏由外籌款湊足應用其外籌之款即請毋庸報銷以  
歸簡易至劉河海口久經淤塞自應欽遵

諭旨及時疏濬惟因籌款不易勢難與吳淞大工同時並  
重濬吳淞江全案 卷一 五

舉查道光四年議修水利如白茆河四江口及此外  
由湖出江由江出海各處會請分年辦理現俱淤墊  
日甚容再隨時確勘與劉河海口次第籌辦其各處  
支渠汊港應由各州縣設法勸修以利農田詳請具  
奏前來 臣陶澍現在由省親詣履勘覆覈無異面飭督  
催工員循照章程堅築壩工先開樣河各立認杆預  
抽子溝併於舉工之始先定椿繩起土之時遠堆隄  
堰一切督察稽查賞罰犒勞務俾實力奉行如果承  
辦各員勤奮出力俟工竣量請

恩施獎敘儻稍有草率玩延定即參處以期工歸實用仰

副  
聖主爲民興利之意仍俟工竣後遵  
旨親詣驗收另行

奏報至動用工費除平糶緩漕米價尙有不敷其由外  
籌湊之款邀免報銷又展挑灘漲之處空廢蕩田在  
所不免此等蕩田多係侵佔官河而成歷年已久如  
有業已陞科者應予豁糧不準再給地價道光四年  
曾經

奏明應即照辦合併陳明所有籌議吳淞水利及興辦  
工程緣由 臣等謹合詞恭摺具

重濬吳淞江全案 卷一 六

奏伏乞  
皇上聖鑒謹

奏  
道光七年十月二十一日具

奏道光七年十一月初八日內閣奉  
上諭蔣攸銛等奏勘估吳淞江挑工銀數並督飭興辦一

摺吳淞江自井亭渡起至曹家渡止工段較長經該督  
等委員勘估分別深淤淺淤估銀二十九萬三千二兩

零又築工頭工尾柴土壩座銀六千一百八十五兩零  
通共挑河築壩估銀二十九萬九千一百八十七兩零

若由上海等三縣領辦恐其照料難周不免草率著照所請除上海縣工長承挑二分青浦嘉定二縣各承挑一分外其餘著添派得沾水利之元和吳江震澤崑山新陽太倉鎮洋寶山等八州縣各承挑一分所有承辦各員如果勤奮出力著於工竣時量予獎勵儻草率玩延卽著嚴參總期工歸實用帑不虛糜工竣著該撫親往覈實驗收其動用工費除平糶米價銀款造報外其外籌之款卽著毋庸報銷至空廢蕩田本係侵佔官河其業已陞科者準其豁糧不準再給地價該部知道欽此

大學士兩江總督臣蔣攸銛江蘇巡撫臣陶澍跪奏為挑濬吳淞江工程驗明如式完竣仰祈

聖鑒事竊照吳淞江年久淤塞關係蘇省水利前經臣等會議興挑奏奉

諭旨遵行當卽飭委司道督同各府州勘估實需銀數及督飭興辦情形復經恭摺具

奏欽奉

諭旨吳淞江自井亭渡起至曹家渡止工段較長經該督等委員勘估通共挑河築壩估銀二十九萬九千一百八十七兩零若由上海等三縣領辦恐其照料難周不

免草率著照所請除上海工長承挑二分青浦嘉定二縣承挑一分外其餘著添派得沾水利之元和吳江震澤崑山新陽太倉鎮洋寶山等八州縣各承挑一分所有承辦各員如果勤奮出力著於工竣時量予獎勵儻草率玩延卽著嚴參總期工歸實用帑不虛糜著該撫親往覈實驗收其動用工費除平糶米價銀款造報外其外籌之款卽著毋庸報銷等因欽此當復轉行各司道欽遵嚴催各工員趕緊如式挑濬去後茲據蘇州布政使梁章鉅署江蘇按察使潘恭常護理蘇松太道陳鑾會詳承辦各州縣於上年十月十一日攔潮

大壩合龍之後雇集人夫戽水興挑祇因開工以後時值嚴冬連遭雨雪挑挖河道積水較多雖經隨時車戽而涸復之後又逢雨雪且時屆沍寒上下河隄冰凌凍結夫役不能立足人力難施其震澤崑山新陽太倉鎮洋五州縣承挑工段坐落野雞墩一帶古淺處所積淤深厚幾成平陸應挑土方倍於他處是以歲內未能一律完竣迨至今年正月天時晴霽飭催印委各員添雇人夫設法趕挑所有起出之土俱令遠堆原定界外築成隄堰以防傾卸復隨時督催各工員認真挑挖務使一律深通以收實效現據署

蘇州府知府李景嶧署松江府知府王有慶蘇州總捕同知范博文蘇州督糧同知王青蓮轉據各工員陸續具報工竣並據新陽縣稟稱所挑工段內起出遠年沈溺糧船一隻板片朽爛艙內尚有磁碗煤炭等物又據上海縣稟稱所挑工段內起出遠年沈溺海船一隻板片朽爛查有洋木秤桿鐵錘等物俱係海船應用之物深入沈淤現經起出候驗等因前來並據藩司梁章鉅詣驗如式<sub>臣</sub>蔣攸銛現赴清江勘工不克會詣吳淞<sub>臣</sub>陶澍卽遵

旨親往驗收於二月初七日在蘇啟行由白茆等處一路

查勘順抵吳淞江親赴各工按照估冊逐段勘量自青浦縣頭壩起至上海縣攔潮大壩止通工計長一萬八百八十九丈有零細加覆勘悉與原估寬深丈尺有盈無絀內有太倉新陽上海嘉定吳江鎮洋青浦寶山等州縣均於原估丈尺之外加工挑挖其寬深多至二三尺及六七尺不等均係捐資辦理並無偷減草率情弊<sub>臣</sub>復以攔潮大壩爲新開河道尾閘若壩基未能啟除淨盡卽於全河大有阻礙遂親至工所督飭該道府及各員弁竭五晝夜之力趕緊將攔潮大壩柴草堅埽及下戢積土逐層啟除淨盡定

限於十七日丑刻先將青浦上游頭壩開放使清水流注充滿午刻將上海下游大壩開放日擊水勢暢出洶湧如雷壩外淤泥立時衝散未刻海潮大至水勢擡高內外刮刷<sub>臣</sub>卽乘潮回省沿途按段測量水深均有一丈九尺至二丈不等實爲一律深通毫無淺滯之處訪詢沿途耆庶咸稱百餘年來未有如此開挖深通之工<sub>臣</sub>逐段驗收歡聲載道卽如各縣所挑工段內起出沈溺糧船海船等多年陳物湮埋江底爲從前開濬所未及者茲皆挑挖起出其爲深通勝於往時已有明證從此舟楫暢行旱潦無慮民生